

北京圖書館 編

北京圖書館藏珍本
年譜
叢刊



第 95 冊


北京圖書館出版社

□ 北京圖書館 編

北京圖書館藏珍本
年譜叢刊

北京圖書館出版社

第 95 冊



第九十五冊目錄

雙池先生年譜卷四		一
周甲錄		一〇三
舜山是仲明先生年譜		一五三
泰舒胡先生年譜		三〇九
憶往編		三八七
世承佐領色爾布年譜		四三七
先考穉威府君年譜紀略		四四五
先文恭公年譜卷首至卷五		四六一

雙池先生年譜卷之四

邑後學余龍光編次

年譜附錄

汪雙池先生行狀

嗚呼先生之沒也六閱月矣心喪脚痛至今不能作一字以寫哀忱其何以狀先生一生之行實哉去歲仲冬曾屬先生子鳴之追成狀略以存徵信而鳴之病中復東云先人一生辛勤道脈其蘊悉見於書至閱歷往往不自言問之亦不甚答故少年及在閩事

無從查考擬將以所聞於吾母及能記憶者次爲一冊屬兄成之兄當不忍辭也今正初八鳴之垂危馳召比相見已失聲詢其節略竟以病故未及成一字至十三日又下世矣嗚呼以先全之學旣未獲顯於時復殤其孫天其嗣而并湮沒其事蹟悠悠蒼天何其酷也顧著述之勤學問之正閱其書者自能知之然一代大儒後日將採其懿行傳之儒林萬一遺佚無從考核則聲光閤蓄豈惟長逝者私憾無窮後死者與有責焉敢略記所聞存什一於千百俾後人知

仰法焉先生姓汪氏諱烜又名紋字燦人雙池其號也其先出唐越國公華後十二傳至道安公以兵馬使鎮婺源因家焉十七傳至淑璋公自浯溪遷段莘又五傳至贈戶部尙書希利公則先生七世祖也六世祖煥祖公明諸生封都察院右僉都御史晉贈戶部尙書高祖諡清簡諱應蛟萬厯甲戌科進士累官戶部尙書理學經濟蔚爲儒宗行實詳志乘明史不具述曾祖元會公光祿寺署丞祖斯涵公府學生博學多能諸子百家之書無不洞曉配江氏亦讀書通

大義與斯涵公考訂古籍閨閣之中如益友焉考諱
士極字樞北天才敏妙工古文詞子二長名焜次卽
先生也先生母江太孺人同縣諸生硃倫公女生而
穎悟數歲時硃倫公嘗於月下口授大學中庸蓋三
夜而經文章句熟背不遺一字稍長益嗜典籍精通
諸經義疏朱子綱目及典故諸書至風雲月露之詞
弗好也清簡公固遺子孫以清白斯涵公已賃屋而
居數傳家益窶太孺人于歸後治女紅以佐饔飧士
極公以貧故不克卒儒業遨遊湘楚閩越閒卒無所

遇後乃幕客金陵歲不通音問太孺人處之怡然口
貧富命也何足憂惟子能讀書成立則幸事耳煖稍
長卽令入塾然資稟稍遜先生言能言善記識太孺
人提抱時往往舉經書口授之聽卽成誦艱於從師
又恐時師弗能教也乃自課督室中置長榻太孺人
坐治針黹虛其半置書又設一小几坐先生於旁教
之諷誦細爲解釋向讀必專一不得左右顧顧輒夏
楚慈母也逾嚴師焉先生天授神奇復承慈訓嚴切
十歲以前四子諸經已習熟成童後習舉子業旁及

詩文亦皆母氏親爲指示蓋終身未嘗一日從師云
弱冠後太孺人得瘋疾飲食於牀第者數年先生躬
執爨撫摩湯藥日夜極勞瘁自傷窘乏缺甘旨及歿
哀毀骨立繼乃憂服省父於金陵士極公語先生曰
爾來奚爲吾無歸矣古人云家徒壁立吾壁并非已
有如此寂寂徒爲鄉黨嗤子速歸毋久畱也先生請
畱侍公曰子無以自存爾更潤我耶且汝性拙此閒
亦無置汝處先生請益力公繼之以怒且囑居停勿
與飲食乃垂涕歸先生少奉母教未嘗輕出門戶與

族眾不習兼之落魄益無肯爲調護者兄嫂俱傭於
人身無所託不得已乃至江西景德鎮傭資畫景鎮
五方雜處市習澆漓先生稟規矩寡言笑又方居喪
食蔬果斷酒肉儕輩羣訕侮之閒爲詩歌以見志羣
以爲謗己族主者使弗留焉先生去之樂平館於石
氏歲餘不合乃厯萬年弋陽上饒永豐之閒至福建
浦城館於陳總兵楓嶺營中先生嘗與兄書云自離
桑梓困苦流離抱病於接竹絕糧於萬年奔走於上
饒幾頓於永豐當此之時自以爲無復生理然某臨

困窮不肯一日忘學遇一草一木之奇必詢之以資博物見一言一行之善必存之以備參考非義之事不敢爲非義之財不敢取致矻以成其學兢業以守其身恐負吾父母之教云則先生之固窮力學蚤歲已然矣未幾士極公歿於金陵聞訃慟絕戴星奔赴盡以所得館穀營宅兆於鳳臺門外迎精而返合衣冠於太孺人之墓仍赴閩館益肆力學問毅然以斯文爲己任館近書肆往往借觀百氏之書無不研究著述亦日以富而先生年逾三十矣先生嘗云自有

知識以來未嘗輟書然三十以前於經學猶或作成
輟三十以後盡焚其雜著數百萬言而一於經研經
則參考眾說而一衷於朱子志專一而用力勤至五
十時覺此理明白坦易浩然沛然無復向日艱難之
態矣先生之於四書也謂朱子集註而後惟勉齊諸
賢躬承師說有所發明何王金許陳胡吳史而下已
浸失微言之緒有明大全之纂當日君若臣皆失其
道安能得聖賢之旨而決擇於羣賢得失之林故朱
子所非者復載之或朱子所取者復畔焉或朱子所

嘗言而意旨別屬者又彼此混附而不能察其言之有因及姚江龍谿以後多以畔傳離經爲事其號墨守程朱如蔡林顧劉輩立言亦有陰與註背而不自知者於是糾繆辨譌成四書詮義一書初意只鋤羣穢不爲講家又以不愜人心難以通貫各章亦略爲挨講曲折詳明無所不盡則或問之遺意也其論易也則曰易言時中之道聖人寡過之書在天涵理而著象在物成象而寓理故上聖得理而顯象其次因象而觀理其次乃卽事以求理得理而顯象聖人之

作易也因象而觀理讀易之方也卽事以求理卜筮之事也然焦京流於術數而易之體亡王何入於虛無而易之用亡自周子作太極圖說易通程子作易傳而理明邵子演先天圖而象著朱子集諸子之大成象數宗邵子義理主周程於是體用備而時中之義明乃圖說見毀於象山易傳受詆於袁樞邵圖見非於林栗象占之說卦變之圖後世猶多議朱子者則甚矣易之難言也先生八歲時戲折竹枝排八卦母見之語曰八卦有斷有連汝所排皆連畫妄也先

生曰兒以仰體爲陽俯體爲陰也母曰是得其意矣
孺子他日其能神明於易耶及著詩書詮義二書成
乃作易經詮義然易藁者數四最後成於乾隆丙子
其於初藁自立議論稍與本義牴牾處皆痛爲掃刮
至於異說糾紛則明辨益力又以明初傳義竝行習
易者因劉朱義以附程本已失朱子之意及後專行
朱義而其本則仍程本是并傳義之本兩失之故詮
義一從朱義古本分別經翼不復劉程傳以附朱義
至程傳義理正當與本義同者亦不復錄惟義有粹

精不可移易本義未及收者則採以附朱義之後或
文義未安有不可從而人反從之者亦稍爲辨析洋
洋灑灑幾百萬言非識義文喫緊者不能作亦不能
讀也尙書則自母口授時頗易之後有問以古文眞
偽禹貢水道者對未能悉乃灑然以書爲未易言而
探討益力自云高祖清簡公爲司徒時戎事方殷講
論天下形勢輿籍頗詳曾祖光祿公研於星經厯史
二者幸有傳言故義和諸章及禹貢皆非所難周諮
殷盤辭贅牙耳難不在是二典三謨九疇洪範伊周

微言與大易中庸相表裏天人之際性命之原也而
唐虞受禪湯武征誅伊尹營桐周公避謗其閒非得
聖人之心何以知聖人之處事不察於性命本原之
地又安足以知聖人之心哉顧詩易傳有朱子而書
獨以屬蔡氏是蔡傳不異朱傳披閱數過豁然有得
更爲詮義一編時雍正癸丑也書成族子麗南攜以
入京後卒於京寓本遂亡失遴以重著爲請先生復
記憶成編大約較舊本損者三之一益者三之一自
序云因敝筆硯重理舊緒十餘年見聞日廣觸緒相